

Құнды қос кітап

Алла өлшеп берген ғұмырында еліне еңбек сіңіріп, бақиға кетсе де жарқын істері жалғаса беретін адамдар болады. Осындай абыз ақсақалдың бірі Серік Жақсыбаевтың өнегелі істері өзі өмірден өтсе де үлгі бола бермек. Екібастұздықтар қазыналы қартты шежіреші, өлкетанушы ретінде жақсы біледі.



Кенже ҚУАТ



Серік Имантайұлы Ресейдің Новосібір облысы, Довольное ауданының Довольное ауылында дүниеге келген. Қазақ орта мектебін Павлодар қаласында бітіріп, одан әрі Қазақ тау-кен металлургия институтын (қазіргі Қаз ҰТУ) тәмамдаған. Қарағанды, Екібастұз қалаларының көмір кәсіпорындарында көп жыл еңбек етіп, жаңашылдығымен танылған С.Жақсыбаевқа 1983 жылы «КСРО Көмір өнеркәсібінің құрметті қызметкері» атағы берілген. Оның Сәтбаев атындағы Екібастұз инженерлік-техникалық институтында кафедра меңгерушісі болып қызмет еткені екібастұздықтарға мәлім. КСРО және Қазақстан журналистер одағының мүшесі, экономика ғылымдарының кандидаты, Екібастұз қаласының Құрметті азаматы. Павлодар өңірінің экономикалық-әлеуметтік, қоғамдық өміріне, өлкетану саласына қосқан зор үлесі үшін «Павлодар облысы алдында сіңірген еңбегі үшін» белгісіне, «Қазақстанның үздік өлкетанушысы» белгісіне ие болған. 65 жыл бойы ғылыми ізденіс, шығармашылықпен шұғылданған ағамыз 70-тен аса ғылыми еңбек, 4 монография, он шақты кітап жазған. Қазыналы қарт артында қалған жұртына өлмейтұғын сөз, құнды зерттеулерін мұра етті. Соның бірі – көзі тірісінде әуелгі данасы қолына тиген «Ғылым Құраннан басталады» атты кітабы.

Өлкетанушы, қаламгер ағамыз қайтыс боларының алдында баспаға «Мұса Шорманов» атты кітабын да тапсырған көрінеді. Сөз болып отырған екі кітаптың тұсаукесері орталық кітапханада өтті. «Мұса Шорманов» монографиясы С.Торайғыров атындағы Павлодар мемлекеттік университетінің доценті Ернұр Рахимовпен және Павлодар мемлекеттік педагогикалық университетінің ректоры Алтынбек Нұхұлымен бірлесіп жазылған.

Шараның басында марқұмның әруағына дұға бағышталды. Бұдан соң

кеш қонақтары - доцент Е.Рахимов пен ақын Ж.Қоғабаяев кітаптар буылған көк лентаны қиды. Ернұр Кендібайұлы Алтынбек Нұхұлының сәлемін жеткізіп, Серік Жақсыбаевқа арналған «М.Шорманов – 200» мерейтойлық медалін марқұмның әйеліне табыстады. «Мұса Шорманов» кітабының бір данасын марқұмның немересіне, тағы 3 кітапты орталық кітапханаға тапсырды.

Зайыбы Шолпан апай Серік Жақсыбаев туралы естелігінде былай деді:

- «Ғылым құраннан басталады» деген кітапты бірнеше тарау етіп шығармақшы еді. Оған үлгермеді. Бір бөлімді жазып аяқтаған кезде «Мен болдым» деген-ді. Расымен, ғұмырының соған ғана жеткенін сезгендей екен.

Сөзінің соңында Шолпан апай кітапқа демеушілік көмек көрсеткен «Екібастұз дауысы - ақпараттық орталығы» ЖШС директоры Айдын Қояғановқа, сондай-ақ, кешті ұйымдастырған Ерболат Әміренов пен орталық кітапхана қызметкерлеріне алғыс білдірді.

Серік Имантайұлы аталған кітапта Алланың ұлылығын айта келе, Құран Кәрімде жазылған жайлардың ғылымда енді белгілі болып жатқанын фактілермен баяндапты. Қалалық мешіттің наиб имамы Қайролла Әбілдәбекұлы марқұм тындырған игі істер туралы айта келе:

- Серік ақсақал сәждеге басы тимесе де, сауапты іс жасады. Оның ел-жұртына сіңірген қызметі, ғылымға қосқан үлесі қабіріне нұр болып төгіледі, - деді.

Айта кетелік, «Мұса Шорманов» атындағы қордың демеушілігімен жарық көрген кітап орыс тілінде шыққан. Кітап енді қазақшаға аударылып, келесі жылы басылып шығады.

Кітапта Мұса Шормановтың XIX ғасырдың 30-40-шы жылдарында атқарған қоғамдық және мемлекеттік қызметі қамтылған. Сондай-ақ, аға сұлтанның этнографиялық еңбегі туралы құнды деректер бар.